


Premier Nelson Oduber:

“Tur hende cu a bin biba aki ariba, y cu ta sinti nan mes Arubiano cu ta stima nan mes y ta stima e isla aki, ta mes Arubiano cu nos...”



ORANJESTAD - Diasabra mainta a tuma lugar e acto protocolario enconexión cu 30 añ di celebración di Himno y Bandera, y 20 añ di nos Status Aparte riba plaza Betico Croes.

E acto oficial aki conta cu presencia di tanto Gobernado di Aruba como Gobernador di Antiyas; además di representantenan y dignatariónan di Hulanda, Antiyas y Aruba; y miembrónan di e cuerpo diplomático acredita na Aruba. Durante e ceremonia aki tabatin un desfile di exhibición di nos bandera nacional; y posteriormente e himno di e símbolo nacional aki hunto cu cantamento di nos himno glorioso “Aruba Dushi Tera”. Despues minister di Labor, Cultura y Deporte, Ramon Lee

a hiba un discurso caminda e mandatario Arubiano a destaca e logro cultural cu nos pais Aruba a logra durante e delaster añanan. Minister Lee a bisa cu celebración di nos Himno y Bandera a bira uno cu cada añ ta creciendo.

El a bisa cu awor mas cu nunca antes “cultura y identidad di nos hendenan di Aruba ta haya respet y reconocimiento cu e merece”.

E titular di e cartera di cultura a declara además cu “awor nos por laga porta y bentana habri pasobra awor ningun otro cultura por bin supla nos cultura benta abou”. Minister Lee a recorda e palabra di Libertador Betico Croes, el a bisa cu e gran stadista Arubiano aboga semper pa Aruba ta uni, awor laga nos

uni.

“Un Aruba uni ta sobrepasa cualkier obstaculo, cualkier diferencia y logra e meta di bienestar general”, asina minister Lee a bisa kende a pidi tambe pa laga e mensahe aki resona den cada skina di nos pais awe y pa semper.

PROME MINISTER

Di otro banda, Prome Minister di Aruba, sr. Nelson Oduber a hiba un discurso, directo, sincero y breve den cuadro di 30 añ di conmemoración di nos Himno y Bandera; y tambe 20 añ di nos Status Aparte. E prome mandatario di Aruba a inicia su discurso cu palabranan di bonbini na e delegación oficial di e islanan di Antiyas pasobra -según nos Prome Minister- 30 añ pa of 20 añ pasa e ambiente tabata completamente diferente.

Premier Oduber a señalá cu di experiencia histórico aki nan como político por siña algo. El a bisa: Politiconan por tin pensamiento pero e pueblonan, su habitantenan tin lasonan di amistad, tin lasonan familiar, cu nos niun no por kibra nan, y a keda existi”.

E mandatario a destaca cu e lasonan cu Antiyas desde cu nos pais Aruba a bira autonomo a bira no solamente ameno, pero un laso di hopi respet, aprecio, reconocimiento, y cu muestra di boluntad pa coopera cu otro na cualkier momento”. Premier Oduber a destaca cu esaki tabata un gran logro y visión di awe den feliz memoria, Betico Croes (q.e.p.d.).

Un punto di e discurso cu Premier Oduber a trece dilanti diasabra ultimo riba Plaza Betico Croes cu a laga

atención di tur hende ta ora cu e mandatario a manifesta cu dia 18 di Maart a bira oficialmente un dia nacional ya cu nos mester tin algo fuera di e balor espiritual di e bandera y canta nos Himno.

“Mester por tin un momento di reflexión un biaha pa añ cu nos tur ta bin hunto y bisa con Arubiano, y tur hende cu a bin biba aki ariba, y cu ta sinti nan mes Arubiano cu ta stima nan mes y ta stima e isla aki, ta mes Arubiano cu nos, pa traha pa probecho y felicidad pa nos tur”, asina e mandatario a bisa den su discurso masha elocuente dilanti di Gobernador nan tanto di Antiyas como di Aruba, además di e delegación bon representa di Antiyas; representante di Hulanda y nos dignatariónan local.